

Ҳеч бир жон Аллоҳнинг изнисиз ўлмас

16:09 / 03.11.2018 4161

Аллоҳ таоло Оли Имрон сурасида шундай марҳамат қилади:

﴿الشُّكْرَيْنَ وَسَنَجْرِيَّ مِنْهَا نُفُوتِهِ ۗ وَالْآخِرَةَ ثَوَابَ يُرَدُّ وَمَنْ مِنْهَا نُفُوتِهِ ۗ الدُّنْيَا ثَوَابَ يُرَدُّ وَمَنْ مُؤَجَّلًا كُنْبًا اللَّهُ بِإِذْنِ إِلَّا تَمُوتَ أَنْ لِنَفْسٍ كَانَ وَمَا﴾

“Ҳеч бир жон Аллоҳнинг изнисиз ўлмас. Ёзилган ажал ўлароқ. Ким бу дунёнинг савобини истаса, унга ўшандан берурмиз. Ким охиратнинг савобини истаса, унга ўшандан берурмиз. Ва шуқр қилувчиларни албатта муқофотлармиз”. (Оли Имрон сураси, 145-оят).

Сизлар ўлимдан қўрқиб, урушни ташлаб, қочиб юрибсизлар. Ҳолбуки, Аллоҳнинг изнисиз бирорта одам ўлмайди. Қачонки Аллоҳ жон олувчи фариштага изн бергандагина, унинг жонини олади.

«Ёзилган ажал ўлароқ» – маълум ва белгиланган муддатдир. Ўлим ундан аввал ҳам, кейин ҳам келмайди. Балки айнан белгиланган вақтда келади. Шунинг учун қўрқмасдан, душман билан урушаверишингиз керак эди. Қўрқоқлик ажални чўзиб юбормайди. Шижоат ҳам умрни камайтириб қўймайди.

Шундай бўлганидан кейин ҳамма охирати учун нима тайёрлаб қўйганига қарасин. Қилган амалига қараб, самарасини теради.

«Ким бу дунёнинг савобини истаса, унга ўшандан берурмиз».

Ким бу беш кунлик дунёнинг дардида юрган бўлса, иймон йўлини тарк қилиб, ҳайвон каби, бу дунё матоҳларидан фойдаланишни ўзининг олий мақсади қилиб олган бўлса, унга ўша хоҳлаган нарсаси берилади.

Лекин белгиланган ажалидан ортиқ яшай олмайди. Охиратига ҳеч нарса қолмайди.

«Ким охиратнинг савобини истаса, унга ўшандан берурмиз».

Кимки олий уфқларга интилса, бу беш кунлик дунёнинг тор доираси билан чегараланиб қолмай, охиратнинг чексиз ҳаётига ҳам интилса, иймон йўлини ўзига йўл тутиб, ҳақиқий инсон бўлиб ҳаёт кечирса, ушбу ҳаёти давомида охират савобига эришишни ўзининг олий мақсади қилиб олган

бўлса, унга ўша хоҳлаган нарсаси берилади. Лекин у ҳам ажали етганда ўлади.

«Ва шукр қилувчиларни албатта мукофотлармиз».

Инсон зотини улуғлаган Аллоҳга шукр қилиб, ҳайвонлик даражасидан инсонлик даражасига кўтарилиб, иймон йўлини тутганларга Аллоҳнинг муносиб мукофотлари бўлади.